





宋蔡忠惠文集卷之一

明後學吳興蔡善繼伯達甫校

古詩

親祀南郊詩

臣襄言伏覩

皇帝陛下親執牲玉以饗上帝酌定大樂登侑三聖  
天地清霽神祇歆格

陛下齋精至誠著見兩間臣叨從法駕躬覩禮文之  
盛職在詞掖不敢以虛陋自棄謹撰成親祀南郊四



言古詩一章凡一百七十六句雖不足以道誦德業  
之光然略掇大要垂傳遐域亦愚臣惓惓之至其詩  
曰  
天昇元統赤運開社聖祖神宗海域平砥思皇真考  
嶽封汾祀餌係戎胡包束戈矢丕顯靈德光被萬里  
民壽而康恩及蕭葦恭惟

皇帝繼文之始兢兢日

御名

夙夜勤只哀憐困窮有

如在已惟刑是恤弗絲怒喜躬服儉約黜棄浮侈罔  
有逸欲曰惟三紀大中則經典亡則史陰陽時序日

緯總軌樂律本原禮法根柢兵韜術數萬微精旨該  
通變貫咸燭厥理歲舍壬午盜發南鄙帝曰汝青治  
辦行李毋大誅割定患則已獵獵靈旗啓道徑指寬  
渠踣仆俘徒授耳嶺服旣平勲賞周被封歿錄孳門  
戶曄曄粵茲明奉農家豐美廬廬積腐庾漕儲峙帝  
咨相臣匪台德爾穹昊眷賚祖考佑昇何施不報將  
祀郊時號令四下若建瓴水窮荒述職奔走輸委仲  
冬丙寅齊寢以俟先時霾晦颶籟號起真意益壯降  
鑒伊邇夜漏適中星露雲靡大輅旣馭清陽出晷休



光無垠令容有偉爰翊殊庭奠享仙機高靈委蛇元  
氣旭卉陰施自遠大功績似擁格純禧益厚丕址入  
宿廟下月魄初朏龍章采藻瓚爵擎跪拜于禰宮慈  
顏僅咫尺至誠馨香其薦滃瀼念哀劬勞譬瞻岵岵濯  
淚霑珪將遂復止京都之南崇丘迤邐飛螭躡塵法  
乘徐柅地環帟幄霄揭隅雉警角飄蕭駭騎連累言  
次言陟實惟告已燭錯霄明壇圪空紫交佩陸離庶  
旄颯纒樂變神格列周甲筴三后咸在上蒼臨視皇  
皇富媪從執邊籩七精閃忽五鎮瑰瑋星官下翔濤  
祗騰跣等級卑高食飲噓哆欣歆告言奏福來底更  
御步輦夾途軍壘鉦鼓警轟跳呼牛鬼異域窮陬黃  
髮稚齒動蕩成波謹喧成市端闈停午玉色尚辰赦  
澤春行幽加蟄蟻廢滯振拔垢瑕刷洗寬貸賦取削  
減連詭

皇帝慈孝下民胥擬

皇帝恩仁四國傾倚

皇帝曰咨群公卿士舜隆聯夔商圯朋齶孰忠予是  
孰讒予匪入官多門孰予室弭蓄兵過制孰予究揣



百姓窘窮其患孰弛外夷狂驕其強孰箠驅人以法  
曾莫如耻化人成俗曾莫如禮百工勅業相予表裏  
登任峻良剗斥姦宄天錫帝年萬有億秭天錫聖嗣  
誥誥衆子乾剛不息章明度揆無疆惟民惟帝其侍  
臣襄詠歌直道是履

荅詔

勅蔡襄省所進親祀南郊古詩事具悉朕惟王者  
之禮莫重於郊謂怠於事天不可以訓是故憲章  
周式參講漢儀序惟仲冬始因陽氣之達卜以南

至躬卽園丘之崇爰升燎以致誠乃推恩而均賜  
卿學窮雅奧詞摛藻綯慶元吉之祚美盛事之成  
啟發英辭鋪昭景鑠溫麗盡一時之妙適逸得倘  
善之長覽玩載周嘆尚無已故茲獎諭相宜悉知

御筆賜字詩

并序

臣襄伏蒙

皇帝陛下特降中使賜臣御書一軸其文曰御筆賜  
字君謨者臣孤賤遠人無大材藝

陛下親灑宸翰推著經義俾臣佩誦以盡謨謀之道



事高前古恩出非常臣感懼以還謹撰成古詩一首以叙遭遇干冒

聖慈臣無任荷戴兢兢營之至

皇華使者臨清晨手開寶軸香煤新泐名與字發深  
旨宸毫灑落奎鈎文精神高遠照日月勢力雄健生  
風雲溷然氣質不可寫乃知學到非天真緘藏自語  
價希代誰顧四壁嗟空貧臣聞帝舜優聖域臯陶大  
禹爲其隣吁俞敕戒成典要垂覆後世如穹旻

陛下仁明如舜禹豪英進用司鴻鈞臣襄材智最驚  
下豈有志業通經綸獨是丹誠抱忠樸常欲贊奏上  
古珍又聞孔子春秋法片言褒貶賢愚分考經內省  
不自稱但思至理書諸紳乾坤大施八洪化將圖報  
効無緣因誓心願竭謨謀義庶裨萬一唐虞君

荅詔

勅蔡襄省所進古詩一首爲蒙特遣中使賜御書  
一軸其文曰御筆賜字君謨者事具悉朕常日罷  
朝閑燕多以經史書藝時用願神因見唐高宗賜  
戴郝李崔四臣之字旨義皆有誨諭卿詞令根于



溫厚筆力極于深妙名以本其所贊字以申其所  
輔偶御毫而援翰俾中璫而特錫良以將厚意而  
表殊寵也敷陳謝懇發爲詩文遵臯陶之言以懋  
其稽古述帝舜之事以思其底績宣明順美重增  
嘉歎故茲獎諭相宜知悉

四賢一不肖詩

中朝鸞鶴何儀儀慷慨大體能者誰之人起家用儒  
業馳騁古今無所遺當年得從諫官列天庭一露曾  
中奇矢身受責甘如薺沃然華實相葳蕤漢文不見

賈生久詔書曉落東南涯歸來俯首文石陛尹以京  
兆天子毗名都翼翼郡國首里區百萬多占辭豪宗  
貴倖矜意氣半言主者承其頤昂昂孤立中不倚傳  
經決訟無牽羈老姦黠吏束其手衆口和附歌且怡  
日朝黃幄邇天間帝前大畫當今宜文陳疏舉時密  
啟此語多秘世莫知傳者籍籍十得一者已足爲  
良醫一麾出守鄙君國惜此智慮無所施吾君睿明  
廣視聽四招邦俊隆邦基廷臣諫列復鉗口安得長  
喙號丹墀晝歌夕寢心如疚咄哉汝憂非汝爲



右范希文

南方之強君子居卓然安道襟韻孤詞科判等屢得  
雋呀然鼓燭天地爐三年待詔處京邑斗粟不足榮  
妻孥耳聞心慮朝家事螭頭比奏帝曰都校書計課  
當序進麗賦集仙來顯塗誥墨未乾尋已奪不奪不  
爲君子儒前日希文坐言事手提勅教東南趨希文  
鯁亮素少與失勢誰復能相扶斬然安道生頭角氣  
虹萬丈橫天衢臣靖胸中有屈語舉啗不避蕭斧誅  
使臣仲淹在庭列日獻陛下之嘉謨刺史榮官雖重

寄奈何一郡卷不舒言非由位固當罪隨漕扁舟盡  
室俱炎陬此去數千里橐中狼籍惟蠹書高冠長佩  
叢闕下千百其群訶爾愚吾知萬世更萬世凜凜英  
風激懦夫

右余安道

君子道合久以成小人利合久以傾世道下衰交以  
利遂使周雅稱嚶鳴煌煌大都足軒冕綽有風采爲  
名卿高名重位蓋當世退朝歸舍賓已盈脅肩諂咲  
不知病指天報遇如要盟一朝勢奪德未改萬鈞已



與毫釐輕畏威諛上亦隨毀矧復鼓舌加其評透迤  
陰拱質氣厚兩豆塞耳心無營嗚呼古人不可見今  
人可見誰與明章章節義尹師魯飭躬佩道爲華榮  
希文被罪激人怒君獨欣慕如平生抗書轂下自論  
劾惟善與惡宜彙征削官竄逐雖適楚一語不掛離  
騷經當年亦有大臣逐朋邪隱縮無主名希文果若  
事姦險何此吉士同其聲高談本欲悟人主豈獨區  
區交友情

右尹師魯

先民至論推天常補袞扶世爲儒方園冠博帶不知  
本樗櫟安可施青黃帝圖日盛人世出今吾永叔誠  
有望處心學士貴適用異端莫得窺其牆子年五月  
范京兆服天子命臨鄱陽二賢拜䟽贖其罪勢若止  
沸反揚湯勅令百執無越位諫垣何以敢封囊哀來  
激憤抑復奮強食不得下喉吭位卑無路自聞達目  
視雲闕高蒼茫裁書數幅責司諫落筆駮驥騰康莊  
刃迎縷析解統要其間大意可得詳書曰希文有本  
末學通古今氣果剛始自理官來秘閣不五六歲爲



天章上心倚若左右手日備顧問隣清光苟爾希文  
實邪佞曷不開口論否臧陰觀被譴始醜詆摧枯拉  
腐奚爲強儻曰希文實賢士因言被責庸何傷漢殺  
王章與長倩當時豈曰誅賢良惟時諫官亦結舌不  
曰可諫曰罪當遂令百世覽前史徃徃心憤涕泗滂  
斯言感切固已至讀者不得令激昂豈圖反我爲怨  
府袖書乞憐天子俯謫官一邑固分耳恨不剖腹呈  
琳琅我嗟時輩識君淺但推藻翰高文塲斯人滿腹  
有儒術使之得地能施張皇家太平幾百載正當鑑

古修紀綱賢才進用忠言錄祖述聖德垂無疆

右歐陽永叔

人稟天地中和生氣之正者爲誠明誠明所鍾皆賢  
傑從容中道無欹傾嘉謀讜論范京兆激姦糾繆揚  
王庭積羽沉舟毀銷骨正人無徒姦者朋主知膠固  
未選棄兩轡五馬猶專城歐陽秘閣官職卑欲雪忠  
良無路岐累幅長書快幽憤一責司諫心無疑人謂  
高君如撻市出見縉紳無面皮高君携書奏天子遊  
言容色仍怡怡反謂范文謀踈闊投彼南方誠爲宜



永叔忤意竄西蜀不免一中讒人機汲黯嘗糾公孫  
詐弘於上前多謝之上待公孫禮益厚當時史官猶  
刺譏司諫不能自引咎復將已過揚當時四公稱賢  
爾不肖讒言易入天難欺朝家若有觀風使此語請  
與風人詩

右高若訥

和王勝之遊普明院

昔賢履道第平時洛都選門外多風塵林端出臺殿  
名園迤邐清小徑縈紆轉修竹環數畝可愛清不變

水生流水靖葉盡危巢見晴日破雲來遊魚過池面  
君意高如鴻孤超遺健羨茲遊恐難屢歷覽豈云倦  
放懷窮幽趣回首抱歸戀裁詩賦景物芬葩有餘綯  
呼童秣予馬追閑性所便

陪諸君會史館園

名園霽宿雨春日正和柔花香泛草際竹影搖清流  
鳴禽自往還游魚時沉浮出門市朝喧愛此林亭幽  
况陪君子讌飛筆更相酬亦有佳人携艷歌清眉愁  
佳人足娛適遠思何夷猶故鄉去千里野堂臨溪頭



夢寐別四載南望無時休王粲昔從軍登樓以銷憂  
今予豈不然每到終遲留

過白樂天墳

樂天本才士羽儀初頡頏脫身避禍機遂得林泉尚  
生愛香山遊處亦香山莽悠悠醉吟魂終古填幽壙  
小堂松檜間躋攀白雲上春日照伊流素波明演漾  
草樹豈有情一步一回望

楊叔武北堂夜話

歲晏物景薄層陰向晚饒輕雲隱微月殘雪棲枯條  
夫君有高適顧我慰寂寥瀟洒開北堂拂榻延良宵  
前几陳古書坐見千載遙間亦發新句幽思含九韶  
神明靜外照念慮醉中消楊雄戒丹轂顏子安一瓢  
良玉不火變翠柏寧霜彫此心固獨往聲利詎得招  
爐灰寒更劃燈炮落仍挑相看數漏板後會誠重要

送胡武平出守吳興

東南有佳士文高志清苦翩然請郡章入居使君府  
雲水生春瀾瑩靜沙可數霽日明旌旗長風送饒鼓  
烟帆十丈船湖山一抔土橘嫩宴亭秋茶香齋閣午



神歡所適宜動默造幽覩應念懷鈇人垂頭證魚魯  
永叔示及聖俞酬荅因奉和寄聖俞

吾友多稱君思見寒附火氣溫玉開籍才敏鏃加箭  
嘗於師魯書言詞屢及我乖疎久益新慕合迎已可  
奈何縻組綬無路動車輶近乃得百篇能詩今信果  
清寒水石春怪險蛟螭鎖遠念烟鴻去呈妍露葩娜  
古人雖已矣風流未應墮東來勿後期山桃綴紅顆

送安思正之蜀

臨字思正

賤者易屈志少年多直情子獨脩節行愛護如目精

辛勤走銓省歷歲纔點名舍居在窮巷門戶面西城  
妻孥愁屢空獨爾心無營驅驟從僮僕間或造予庭  
是時楊叔武相值極驩誠妙言發潛穉遠意倍幽萌  
羞謏刺俗子指悉條邊兵過從豈云厭時節忽崢嶸  
叔武守岳陽別去方行行子今復之蜀蜀道天險并  
橐中無一錢劍外幾百程春風卷地來凡草猶奮榮  
如何使之人憔悴氣與形內富在乎我外窮繫於生  
此事久已判努力敦誠明吾友黃君度實乃浮其聲

子往從之遊切磨固相成

城字君度



寄襄城孫主簿

昔子向穉孩從親來此邑今子稽簿書職守仍前襲

其父嘗爲縣主簿

歲月曾未幾風流正相及新硎刃益銛舊

署墨猶濕非徒吏氣奮固使家聲立征調事漸繁須  
材時所急何不一軒翔榮名亦可拾勗子乃自省滿  
顏抱羞澁

任山歸河東

風俗憂思淡在昔言汾絳之人隱其間白首甘陋巷  
畢力事詩書豈特專記誦編年作通記起周迄炎宋

甲子二十五迴環補遺空予聞春秋法尊王正一統  
維持生民綱樹立大邦棟上賢若游夏鳥獸於麟鳳  
三傳自名家講解或失中區區休預徒奔馳困羈控  
排闥僂異端寢久成蠹蟲仲淹著元經劉蕡比奴從  
去聖日彌遠斯言誰折衷猶勝女曹兒烟雲費嘲弄  
君於春秋學勤勞務包綜向時耻飛箝畫策尚擒縱  
羗戎負恩德王師壓秦雍邊圉重瘡痍堪爲賈生慟  
廟堂誅賊謀謂與天下共詔書入巖穴丐告嘉謀貢  
使者出河東輒以姓名送謁來遊京邑天門如可狃



崑嶢雙浮雲下有千人儼  
扳緣逐聲利激射苟祿俸  
蹭蹬不敢前撫心愈疑恐  
短翮無吹噓微芳少培擁  
客舍逼隆冬蕭條殘雪凍  
悠悠晉溪上水石挂清夢  
長謠復西歸孤懷不偶衆  
身窮見節義物曲何時用  
美田隨意耕寒魚傲經種  
夜堂素琴橫晚案青蔬供  
決然顧予別蕪音強吟諷  
持歸傳里閭亦足侑壘甕

姑胥行

香涇無故流胥臺有餘基  
太伯以德啟後王結心師  
夫差昔好戰戈矛臨越陞  
天蟹須食稻未拯吳人饑

于今十一貢貧甚吳王時  
全吳古都會腴田漑湖陂  
雨暘適小變數米不足炊  
吾知事本末本末何由知  
家戶徼福利坐輸黃衣兒  
平糴連拖漕八朶天兵頤  
困窳不夕儲勢若偷生爲  
長慮且後顧荀卿有良規  
泊吳江寄胡武平

遙夜吳江瀕露坐鬚成葆  
天空不帶雲野迥正收潦  
徘徊波上月灑漾浮光好  
清風送炎歊翻覺穉氣蚤  
乃問茗溪路舟虞爲予道  
水行至州下樓臺壓烟島  
爭居譬如仙嘉產極富媪  
念君鎮雅俗適以資恬浩



豈不欲一往驩誠寄鳧藻縱遊窮佳賞劇論寫幽抱  
嗟予遠庭闈六年見春草終日諷陔蘭無路羞羊棗  
胡爲久去家一慮心如擣今而賜告歸計課免讎計  
前之奉慈顏敢憚勤輿皂北來尚何時汀洲白蘋老  
儻得杯酒同爲君一醉倒

遷陽道中奉寄楊正臣同年并序

襄頓首頃年同年秘校楊兄以疾去官退休于家洗  
洋自適無不如意每念不得一奉從遊之後以觀塵  
外之趣如何也前歲復往邑中未始一通問訊懷恨

無量今者賜告迎親歲暮道遠歸心搖搖又不得一  
造門下顧塵容之人益可愧耳過遷陽路輒書一篇  
以導企念之思兼伸起居十二月二十八日襄頓首

詩

名第同一籍家園連七閩何爲別厓宇於今十四春  
昔子補一尉扶病走風塵歸來解組紱宴處頤精神  
架書括遺逸甕酌涵清醕東阡與北陌候問通慇懃  
或言疾良瘳呼盧氣益振或傳近詩句平淡與古隣  
語之天下事塞耳不復聞寧當決引去道固有屈伸



雙溪集卷一  
卷一  
嗟予仰尺祿對讎申秘文天子誤採拔指名嗔諍臣  
力微責任重百慮加一身列章乞便郡賜告迎慈親  
窮冬過黎嶺山蹊出幽榛俯澗下坎井斗起攀蒼旻  
水石啣晚沙霜風變朝燄粲粲澗中花孤芳能自珍  
斑斑雲上鳥朝鳴亦求群歲晏時節動天遙客愁新  
去子無蹉步笑語絕燕秦作此欲招隱翻愧林泉人

碧峰亭

虛亭城西隅開檻俯臨北青山正相向萬狀呈峭格  
落日涵紫翠淡春變顏色雲石抱幽致猿鳥自娛適

上窮林端寺下見海內國賢侯乘閑來四座揖佳客  
歌吹有杯酌筆硯角文墨雄談連今古大笑一歡戚  
嗟物亦時遇曠久茲乃得從知閩州圖復記新名迹  
憶第有序

丙子年春三月予解官漳州與弟君山西行至順昌  
富屯之間夾溪十里紅白薔薇盛開時與君山臨流  
飲而賦詩甲申夏四月二十日復來追悼君山之亡  
留詩屋梁以紓哀思

清溪曲曲抱山斜遶溪十里薔薇花春風吹香襲人



骨乾紅淡白相交加眼睛眩晃不能視爛如赤日凌  
朝霞時有扁舟向中下共疑來處從仙家于時邀我  
臨流飲下踞大石盤犬牙平生意氣一快論屈指世  
務還驚嗟酒酣糜紙探強韻胡塗醉字成亂鴉侵更  
把火入官舍下馬猶吟詩名誇何言花落悲人世只  
見溪流度歲華今年初夏我得至淡叢晚艷餘孤葩  
山川故物依然在惟子別路幽明賒想象音容杳何  
許桂旗獵獵隨雲車悲來獨坐蔭芳樹涕淚揮洒霑  
黃沙行人怪我愛溪水那知此恨無邊涯

道中寄福州王祠部

臨津館下日銜西風卷寒潮上碧溪畫舫急槳隨潮  
去山川滿眼烟淒迷醉起開船看潮落林淡日落哀  
猿啼離魂復與潮東下兀然愁坐心酸悽今年賜告  
歸鄉里翩翩飛鳥投故棲雙親素髮喜我至鞠撫歡  
笑如嬰兒東阡北陌來慶問嫗翁壘醖交持携雖欲  
晨昏在環堵奈何職守通金閨春暮辭家就行役幽  
蘭在手空萋萋閩州太守意慷慨一見歡甚無町畦  
欲令邦人滿瞻聽醜酒高會搥鼓鞞我知君侯落落



者胷中氣象盤虹霓問之當今至急務無若羗虜方  
突梯君言區處果得術勢類龜隼持寒鷄養兵精悍  
不在衆黠賊頭顱可立提海隅僻郡誰與語強欲論  
別懲吹蓬又言人生尚忠孝二者輕重均銖圭以諫  
名官宜盡節健行勿繫驂驅蹄別來破熱走山驛神  
疲骨瘦顏容黧作詩遙寄復感激豈不戚戚論垂睽

龜山夜泊書事

十月淮水平瑩淨鋪寒簾浴日弄浮光涵山碎青點  
開帆直千里快去曾非漸盲風陡作勢怒浪立呈險

枯林助呼嗥巨蜃工騰閃隈崖少休息繫纜猶欹颭  
忠信古云仗姦邪神所貶扣心良自安潛祈亦羞諂  
夜分群籟息天明惡雲斂霜威寒更清霽色鮮可染  
懷安固俗喜乘危豈予歛賜告雖慶幸被恩實慚忝  
慈親慰衰髮嬌兒別啼臉人情足愛戀將思輒閉掩  
世事忽憂驚來起類癡魔金絮北餌胡弓刀西壓陝  
天子欲求理群材務撿檢大明破昏翳久弊刮痕玷  
有如大上御名屢時拙者亦磨剡行路勿遲遲流年空蕘

蕘



送楊渥赴西安主簿

余思去夏還甌閩溫風赤日爭陶蒸舟行夜寄浙江  
稜江濤洶湧來相仍雷電翕號蛟螭騰方牀竹簟寒  
生冰上隴西去景色澄青山兩向水一絙猿鳥啼叫  
交酬應晚樵出霧魚投罾脫離滓濁躋陵競造託微  
波訊嚴陵清遐可使貪者懲山窮水盡乃攀登爛柯  
巖岫孤峻嶒幽邃闕矚岕險憑少畱觀愛喜莫勝子  
官其間良足稱子材又美神粹凝萬象態度遭披凌  
吟咏設寫踰畫繒當有味者論淄澠今予癡仕如龜  
慮興子姑去嗟予未能送子一念魂九升

贈勤師

蠅飛塵滿耳汗浹膺聞子大觚行可乘骨目森竦神  
勤爲浮屠人形類心不偶獨負山林棲遠犯風塵走  
如聞大衆居乃是賢豪藪專意學文章韓編不離手  
退之所尚者豈以言深厚徑馳周孔域不爲雜說誘  
大凡民之生虫豸均一醜聖人酌中道君臣與夫婦  
飲食若衣冠事行而易守不喜釋老言抵斥遭誣負  
子今讀其書無乃相紛糾學本勿學末何爲恤衆口



和黃介夫憶竹

君家有美竹繞廬千百箇種時意慮淡別後年華過  
顏象日益新根本久已播石間鳴溜去烟外哀禽和  
子特何依因茲焉辜嘯卧慈親齒髮暮學宦非敢惰  
風雲乖會遇羽翼頓摧挫遺經極精究收功若計課  
懷策遊鉅公鯁語幾喙唾忍腹大窮歸離魂費招些  
予嘗欲論薦身微蟻在磨藉令或指摘聲名屢自墮  
吾師天下賢黜羗久未破屈禮致豪英雋材多將佐  
古來成恩士乃是翳桑餓况子挾所能何門不驚坐

丈夫感氣義豈肯類市貨行矣勿棲遲曷曰祖車軌  
憶竹夙有尚直節無染漣勉哉困益堅持之以爲賀

李山英以疾歸田客有言山英移書石守道者  
因據取其略作詩以送之

吾友守道氣剛勁醜邪扶直出天性意高身賤無所  
發留中事事先後併襄嘗畏其大勇果願以中直爲  
得正忽聞魯士李山英移書告之要力行曰今天下  
竄急務邊頭戰守羗夷橫異術紛回蠹化原佞夫欺  
巧疵邦政生民失職餽歛繁勢若久旱方雩榮安得



快雨洗長空萬物蕭森蒙大慶古人有以身殉言前者已僵後者更况值朝廷上寬大苦諫兼容天子聖我疾不幸子可屬或列封章或庭諍勿學得路世俗兒軟語妖歌日酣鬻乃知山英落落者支革雖疲心愈競予思物理似顛倒難用智愚准衰盛賢豪既少遇又稀或老且困壯而病就令貴顯亦迤躋左觸陰機右臨窞一思九嘆起呼天何等官曹司是柄由來宰主都冥冥用捨惟時窮達命山英歸去亦何恨門外無塵春色爭回看名宦似浮漚都把雄心付觴詠

送許寺丞知古田縣

大雪擁都門子行亦良苦予貧乏觴豆子車誰爲祖少止聽我言於子不無補于今方用兵連年戎羗虜戰歿動萬計募人填卒伍賜衣靡國帑走粟填邊庾平時賦稅外弓刀甲楯弩千名應急須筋皮角毛羽前年科鞏鞏農牛半斤斧殺之先冒禁不殺卽鞭楚江南供鵬翎是物不棲渚十倍買所無贏利資商賈編紙作戰錮紉聯驅婦女輸來不適用空屋窠虫鼠此類如蠲毛更僕難悉數大凡歛貨財百姓若外府



苟可入軍須豈敢怨官取蓋患在不均又索非其上  
有司失預計臨事纔披簿嚴程弗渝日落符灑飛雨  
使者但依違州家不敢主况復爲邑令嗜嗔莫仰吐  
其間或得才吏手無容舞子今佩縣章所領十萬戶  
志慮固精明利病前可覩姑能務均一瘵瘼庶蘇瘡

遊鼓山靈源洞

郡樓瞻東方峴光瑩人目乘舟逐蚤潮十里登南麓  
雲淡翳落前樹暗迷幽谷朝雞亂木魚晏日明金屋  
靈泉注石竇清吹出篁竹飛毫劃峭壁勢力勿驚觸

題名石壁 捫蘿躋上峰大空延眺矚孤青浮海山長白挂  
天瀑况逢肥遯人性尚自幽獨西景復向城淹留未  
云足

新作春野亭

太守職民治詔書勸吾農載酒事緬邈作室當解中  
况憑軒牖高中視田野功澹淹沐新澤依微生柔風  
江潮漲新綠山麓延朝紅耕鋤時節動歌謠聲音通  
慙非共理材幸邁頻年豐未厭畝畝樂駕言誰相從  
春野亭待月有懷



浙瀝涼風來空郊生暮寒山氣鬱蒼蒼江流去漫漫  
闔關行人稀投棲夕鳥還踈鐘度林際華月吐城端  
徘徊待遙夜露下明河寬心明隔萬里獨坐起憂歎

宋蔡忠惠文集卷之一終

宋蔡忠惠文集卷之二

明後學吳興蔡善繼伯達甫校

古詩

送柯秘書三子歸泉應詔

秘書昔共官臨漳時呼三子侍側傍脩瞳闊額善應  
對舉措不類群兒行遙知成就在他日爾時迄今十  
載強閩州太守無伎術乞持符竹還故鄉近觀詔書  
下郡國選訪行實登俊良巖然三子復過我衣裾飄  
洒疑穉霜各携編軸幾百幅互以理要充詞章久之



潛思叩幽眇角牙騰觸聲礪言歸溫陵入場屋爭  
奮筆舌論短長海鷹上雲出爪翼天馬歷地無羈韁  
秘書多才晚未遇有如此子傳義方吾徒沉昇不須  
議且看少者騰聲光

州學餞送解發進士

坐中分得意字

朝家歲取天下士官守小大悉分治育材論薦苟失  
宜德業英豪苦難致予嘗備負內供奉作書參議科  
場事鄉舉察廉未易復責其節行在長吏策之當世  
之大務適時可以觀周智問之六經之歸趣知言可

以見精意衆賢一劃天子可開設學校朔南被世儒  
苟欲便有司詔令初傳尋已置今年郡國選多士糊  
名仍舊搜瑕類常憂璣貝隨手遺徃徃中夜起不寐  
拆封辨號指姓名十九冥合州人議眈眈黷舍秋景  
長芳殺旨酒邀賓醉惜哉今樂與古異遣士禮數不  
能備霜天寥寥萬象清健風開送群飛趨大明帝居  
一氣俯春日照耀桐槐翠勉思奇策當天心厚祿榮  
名時所貴時之所貴亦外物君子存誠思遠至

記題滁州豐樂亭



君爲滁上守乘閑務幽尋群從留山阿美望窮前林  
良醺追佳賞高亭曠遐臨烟雲無定姿水石唯清音  
靜見魚鳥適遙聞雞犬淡時節屢豐有民里無欺侵  
豈獨延衆物因茲託冲襟大筆每絕唱芳樽寧孤斟  
別日念已長來期詎能今安得凌風翰相從殫歲陰  
達觀亭

峭峻釣龍石飛亭壓其端曠徹四無際因之名達觀  
扳雲躋大唐仙路何紆盤秋明澄遠綠晚霽凝新寒  
城郭烟火稠水陸漁樵安偶暇按民俗適遊心意歡

鳴絃俯清流對酒環蒼山重拂衣裾爭從帶夕嵐還

聖泉

塌十餘年今復溢俗傳燠則民安

源流出何山湧涸茲有異湛然盈不泓餘波下金地  
清甘本無滓渴飲得真味端能發茶色博亦資農利  
矧茲民俗安溢溢尤可喜蒲酌復携歸良追曲肱意  
聖泉寺松徑 徑中草不植

青松萐萐門前道根底堅牢顏色好鳴籟蕭森風雨  
生紫鱗開動龍蛇老天若有意別留種百年其下無  
織草雷霆遶遶雪霜重勁節支扶不顛倒野姿峭拔



已背時肯要藤花強纏抱南方赤夏苦蒸濕萬木無  
聲就僵槁忽經密蔭少休息肌骨便驚秋氣蚤寄言  
匠者勿復顧留作清涼除熱惱

### 釣龍臺

龍在固神物動與風雲會胡爲脫淵泉輒觸鈎輪害  
無乃護明珠睡日方膏昧而或嗅香餌貪涎適霑濡  
不爾騰角牙自銜鱗虫寂來應川岳搖去等蟬蛇蛟  
傳聞曠百世茲事久掩曖空餘古臺石碑砥塵沙外  
湍流卷白日巖壑動清籟乾坤終蒼茫物理有否泰

### 授轉運使罷州端居述懷

被詔領均漕前解閩州符掩關謝來賓釋然捨攣拘  
日晏眠空齋啼禽在高梧神情已欣快疴恙還輕蘇  
甃閑固自適况與塵滓殊勿樂夸毗子開眼趨良途  
投身試羅網反用腴妻孥精慮成長謠鑒此非迷愚  
移居轉運宇別小欄花木

三年對小欄花蘂見顏色紅薇開已久春風嘗先得  
素馨出南海萬里來商趙團團茉莉叢絲香暑中折  
餘畦十數種自亦尚風格念爾幽芳性乞致多手植



瑤草固微生栽培子豈德別去重來看猶使中情惻

北苑十詠

出東門向北苑路

曉行東城隅光華着諸物溪漲浪花生山晴鳥聲出  
稍稍見人烟川原正蒼鬱

北苑

蒼山走千里斗落分兩膺靈泉出地清嘉卉得天味  
入門脫世氛官曹真傲吏

茶籠

造化曾無私亦有意所加夜雨作春力朝雲護日華  
千萬碧玉枝戢戢抽靈芽

採茶

春衫逐紅旗散入青林下陰岬喜先至新苗漸盈把  
竟携筠籠歸更帶山雲寫

造茶

其年改造新茶十斤尤極精好  
被旨號為上品龍茶仍歲貢之

屑玉寸陰間搏金新範裏龍鳳茶八片為一斤上品龍茶每斤二十八片規

呈月正圓勢動龍初起焙出香色全爭誇火候是

試茶



兔毫紫甌新  
鱗眼青泉煮  
雪凍作成花  
雲開未垂縷  
願爾池中波  
去作人間雨

御井

井常封  
鑰甚嚴

山好水亦珍  
清切甘如醴  
朱幹韓音待方空  
玉壁見深底  
勿為先渴憂  
巖扃有時啟

龍塘

泉水循除明  
中坻龍矯首  
振足化仙陂  
回睛窺畫牖  
應當歲時旱  
噓吸雲雷走

鳳池

靈禽不世下  
刻像成羽翼  
但類醴泉飲  
豈復高梧息  
似有飛鳴心  
六合定何適

修貢亭

予自採掇時  
入山至貢畢

清晨挂朝衣  
盥手署新茗  
騰蚪守金鑰  
疾騎穿雲嶺  
修貢貴謹嚴  
作詩論遠永

題譙國評事壁

長崗隆雄來  
北邊勢到合  
下方回旋三世  
白士猶醉眠  
山翁作善天  
應憐如彼發  
源今流泉子孫  
何數鷹馬然  
有起家者出  
其間願翁壽考  
無窮年



遊冲虛觀

按圖經黃霸昇仙之地

真人玉骨輕御氣升瑤臺俯首視下方萬落腥塵埃  
香火久寂寞山川空徘徊舊樹絡青蔓虛壇生紫苔  
宴坐白晝永長吟清風來飛花亂棋子游蜂依酒盃  
嘉月當醉飲上客誠珍才神仙那可冀金鼎何時開

題延平閣

雙溪會一流新構橫鮮赭浮居紫霄端卧影澄川下  
峽淡風力豪石峭湍聲瀉古劍蟄成龍商帆來陣馬  
晴光轉群山翠色着萬瓦汀洲生芳香草樹自閑冶

主郡王士安高文勇枚賈顧我久踈悴霜髭漸盈把  
臨津張廣筵窮晝傳清竿舞鼉驚浪翻歌扇嬌雲惹  
歡餘適晚霽望外迷空野曾是勅遊人意慮亦瀟洒  
送勤上人歸吳中

吳江水好吳岫靈吳人替白神氣清當須比屋皆佳  
器奈何儻有名公卿究觀是事見藏伏例學浮圖超  
灰生遂令才智蓄利澤若日不下霑四瀛勤師內外  
久着力文字骨節初老成十季棲遲輦轂下淵然澹  
薄無經營惜哉明了足見解獨摩迅翮翻青冥殘纒



勿別東南去塵土擺落衣裾輕西湖勝處拂談席綠  
波盡舫吾其行

送石昌言知宿州

符離封城古雲望扼控東南地形壯飛流金粟走舟  
車鎮壓奸雄宿兵仗昌言才思老臺閣聲名遠出風  
騷將倦直承明得守符詔書遣臨士民上萬家裁製  
須得空譬若柳楠迎大匠京師從遊日月久送君酒  
酣益惆悵人生豈効鷄鶩群意在糠粃取甘養邊隅  
多故方急材徃徃稠人拔公相吾儕有策空自奇皎  
皎丹衷亦誰亮欲隨戎馬僅勝衣強作文章還覆醬  
大都用置繫於時丈夫未死固難量觥巡卷到君勿  
辭行看岸下船頭放我今聯束若愁鷹注日青雲思  
遠颺一麾當復泛隋渠願君加數爲公釀

觀宋中道家藏書畫

宣獻業文學嘗作調羹鹽藏書百千帙傳世惟清廉  
東堂得春和花卉晨露霑之君延賓從當畫寒珠簾  
朱函青錦囊寶軸紅牙籤大令至歐褚屈玉聯鉤鈐  
草行戰騎合楷正中軍嚴水墨固昏淡骨氣猶淡潛



江田亦名手農野與鋤鑿桑麻婦女喜饁餉兒童覘  
列女自幽閑明眸咽頸纖昔人何遙遙意會相披瞻  
南曹古貌醜博士新詩炎持杯屢屬我謂我毫錐銛  
煤嫗浮醉鈿研流泣秋蟾放洒雲雷起取餘風浪恬  
鄙藝豈足多詫語誰能謙因思左宣獻載擲陪車幘  
辱公知遇厚表裏曾無嫌間復請筆法指病如投砭  
今朝觀故物措已悲慚兼層丘恩德重素髮季華添  
不能枉尺尋况乃事飛箝壯心久已衰奇尚顧未厭  
幸公有令子辭源橫江濤劇飲以自慰後慶其人占

西齋秋暑

齋居一室靜晝永來風微仙碁覆前局女布便輕衣  
向人顏色強與世心事違且効金門隱詎有田園歸

胡鴈

胡鴈畏空漠群飛嚮洲渚寒雲避射弋萬里聲悲苦  
月色滿關河欲下迷處所春江沙平爭魚蚌不可數  
飽暖身肥腴歸路欲遠舉尋常弓箭兒仰視隨意取  
從來遠禍心狼籍失舊侶小哉啣蘆智豈識保身語

卽惠山煮茶



此泉何以珍適與真茶遇在物兩稱絕於予獨得趣  
鮮香筋下雲甘滑杯中露當能變俗骨豈特消塵慮  
晝靜清風生飄蕭入庭樹中含古人意來者庶冥悟  
題周著作作萃賢亭 周君善詩與碁

君家作虛亭獨得江山清四向各有適萬趣咸自呈  
夜深虫鳥息漸聞泉石鳴日高烟靄去始見峰巒生  
之人務佳尚意與賢豪傾中盤滄薇蕨俯砌巖甌罌  
毫端潛造物局上暗投兵樂遊時境邁薄宦身事縈  
種花行老色馴猿無故情蕭散復後期外塵殊可輕

瞻禮開師真像

輕瀾還故潯墜軫無遺音好在池邊竹猶存虛直心  
往復二十季每見唯清吟覺性既自如世味隨浮沉  
琅琅白雲姿悵望空山岑豈不悟至理悲來難可任

偶作

作墨本誰氏研摩有強弱摩盡不見墨此處元非着

至和雜書 五首

八月一日

淮天過盡入吳渠蘭亭晚日光踈踈金桃傳粉好顏



雙溪集卷之二  
先齋詩集卷之二  
色綠醞泛灑淡車渠觥巡屢卷明星出花翹零落隨  
衣裾么絃不動疑古意春容淺破長眉舒庭院簾帷  
一齊下紅臘陰沉霜浦瓦鷄頭軟熟七月終舉手分  
傳玉盈把席前碧甕覆瑤漿一秋愁淚風前洒雲中  
寶暈萬重高付與輕綃藏水麝孤城寒柝夜迢遙誰  
道劉郎有天馬歸來却問東海桑海浪漫漫彩虹挂  
紅絲縈膾曉刀鳴雙龍笑斷夢中驚莫將團扇掩塵  
匣曾障清歌十數聲

八月二日

濃雲瞥過雙鳳飛清顏照射朝日輝畫舫南畔烟成  
陣鮮荷掩護仙銖衣凝魂杳眇不知處酒醺香破驚  
新知一聲入耳醉人骨天容牢落屋點稀海山萬里  
風濤外扶桑未老成春絲春絲不斷縈成結玉環宛  
轉無窮時曉簾半上香飄穗笑指冰壺凝遠淚秦樓  
後夜鎖孤鸞穩風不動烏龍睡願將瓊樹隔花看一  
一花房暗相值濁水芙蓉天際雲長時倚望清江濱  
迎來未語送歸速暮山紫翠空含嘯勸君美酒千萬  
壽情如芳草季季新



八月九日

曉虹跨江一千尺平浪東西入天碧遊人初覺秋氣  
京衣不禁風薄羅窄漁家小艇方醉眠艇裏長魚三  
尺白彩欄北倚數流螢似與流螢舊相識香脂揩盡  
暗成雲銀甲試絃初未直橋前流水聲潺潺季華一  
去何時還重來若問桃花路記取松亭月影間

八月十二日

高樓中天月色爭玉山禾熟秋雲映草邊水際見流  
螢流螢獨自尋香徑稜層鴈塔挂千燈密意雖通語  
還併城上驚鳥飛復啼落泊無依終不定欲下長橋  
夜漏淡燭臺飄炮青梧陰仙人若也乘鸞去彩霧千  
重處處尋

八月十九日

潮頭出海卷秋風風豪潮起蒼海空弄潮船旗出復  
沒騰身潮上爭驍雄沙頭萬目注江水晴雷乾電來  
無窮窗外簾旌飛獵獵新醅翠尊行坐中欲作吳詞  
弄清晝回看滿眼西陽紅六曲屏淡映雲母珠盤縷  
縷青鴉茸山移海轉有變化生緣長短須相逢



讀樂天閑居篇

讀樂天閑居篇云君看裴相國金紫光照地心苦  
頭盡白纔年四十四乃知高蓋車乘者多憂畏予  
感其說因抒鄙章

予年四十四髮白成衰翁非有高蓋車曷與賢者同  
嗟予出寒素家世常力農十九登科第聖轂叅英雄  
十季出吏選校書蓬階中是季二十九天子設採拔調有  
諫諍風旣叨言責地三十一寒寒思匪躬竊不自度量  
語刻劾邪骨一毫抗千鈞擯落無流蹤同時皆驥首

金紫斑著崇唯予守長樂幸就祿養豐

三十一八季江

海外再上螭階東四十入西閣宿仇司化工蒙錦設  
機穽唯賴天聽聰代言遊禁密侍從多從容尋行京  
兆事擊斷露銛鋒是職非所好輒以死竭忠願闢大  
幽都爲君囚四克願拂西省堂爲君延夔龍願舒泰  
山雲甘澤成歲功願回太清日晴景破陰蒙願躋萬  
人壽夭扎終不逢願令編戶富食衣無困窮群臣走  
率職陛下居法宮文彩成禮樂籌略羈夷戎意言亦  
良苦精神庶潛通短步趨遠道心健力不充蚤衰鬢



已華憂傷乃自攻我知古人心生德貫上穹何爲論  
貴賤貴畏非太公南歸雖云樂此念殊忡忡

宋蔡忠惠文集卷之二終

宋蔡忠惠文集卷之三

明後學吳興蔡善繼伯達甫校

古詩

元日過浦城西陽嶺

逝者東流水情知無却迴遲留曾到處嗟古不同來  
誰道新年好風物恐將淚眼向春開

題將軍巖

赤日正停午解衣巖石下石泉殊甘涼野籟亦瀟灑  
驚猿度嶺雲遺果墜庭瓦披軒忽永歡幽抱不可寫



安靜堂書事

勿學異世人過常不可淡勿學慢世人側身隨浮沉  
白日當青天難破是非心不有拔俗器安得太古音  
大暑苦煩濁清泉流高岑烈士無戀膠至理須推尋  
丙申秋八月過漁溪驛驛舊有梅數株嘗題詩

記今無有也 二首

曾把蚤梅枝思君在別離別離雖云遠萬里有還期  
樹枯根已撥人去復何之故館動秋色雲物藏寒曦  
清香不可聞衰草空繁滋一夜平堦雨輾轉良自知

又

梅花不復見况乃扳花人花飛別故樹粉黛化爲塵  
鼯風卷落葉虫豸鳴悲辛昏鴉接舊巢匹侶自相親  
缺月行復滿歸雲本無根因題憶花篇此意難重陳  
荅葛公綽求猿

子求穉猿書至聞我說猿意持贈君吾州四面列巖  
巖鉅木輦葛凌氛氳深窠栽檻走疾置十日可至澄

江地名濱嗟憐庶品各有性拘憂適喜無間分彼猿之  
類宅丘壑愛戀淡厚編前文戲禽雖傳古仙者射臂



未許今將軍朝棲喬木之蒼莽夕飲幽澗之潺湲山  
空月明一長嘯商船海上迎風聞君家東園豈不美  
檜竹翠密蘭茝薰斯猿儻憶故時侶舉首斷隔千重  
雲縱之不遣乃得所推夫此理惠澤霽令吾郡邑決  
籠柳蹄者奔逸羽者紛因觀微物通萬化譬諸獻鵠  
良有云

秋夜書解中壁

遙夜不能寢值茲節物清大空瑩虛碧仰觀澄性情  
素月若可把浮雲何故生瑤琴且勿弄誰怜希代聲

秋思

幽蘭受新霜孤鴈叫落月沉憂何由平永夕不可徹  
將琴鼓憶伶曲聲聲急弦屢絕芳華日益遠香澤物已  
歇秋風吹石門思君還復訣誰云無生忍識此悠悠  
別

寒食梨花小飲

江南寒薄春常蚤花卉入春先自老嗟予衰病不及  
時出見池園半青草縱有餘葩在葉間行看落片隨  
風掃尋春已過索寞歸重憶歡娛耿懷抱雖然妖艷



難再得但只逢花須醉倒二月中天寒食朝牆隈忽  
見梨花飄開門四顧粲然白傳催翠轡賓朋招長吟  
環遶不知數漸值明月臨清霄誰剪輕雲成碎蘂天  
留密雪封枯條重重盡挂珠纓絡簌簌初呈箇步搖  
傍花行酒發新唱滿座例舉黃金瓢西都姚黃高一  
尺楊州寶髻分雙翹幽香絕艷信尤物設欲置之千  
里遙壁門寫生亦名畫未免五彩塗鮫綃莫如此君  
慰人意相對一笑開無膠古來英豪多感激坐使綠  
鬢朱顏彫勸君且作梨花飲御今上名社勿稱量別流品

雨晴蚤出

徂秋久不雨霑濡纔此旬新陽爭萬物太虛無一塵  
老稚出曠野鋤犁及清晨愛爾安居樂力作勿辭貧

訪天台庵

幽人去未還門戶和雲閉亭午樹陰圓淡冬泉響細  
寒生群鳥鳴清徹孤鶴唳寂寞傍山歸寫向滄溟際

和吳省副青梅

梅萼畏高寒獨向江南發那知汴陽墜青顆摘春月  
持之矜所無歸思動楚越願君侑清罇行恐新芳歇



留別舊居花檻

別意起中夕出門風吹衣側月光艷薄餘花香氣微  
清尊歲相向欲去心有違殘葩勿盡放主人行亦歸  
甲辰閏月初伏快雨涼風晝眠初覺庭前小欄  
花木各有意氣効柏梁體

閏夏天氣熱焰烘崇朝快雨隨清風晝軒夢覺開前  
櫳畫欄花草意氣雄側枕遙問數異同如子微物煩  
化工盍各言爾之所從繁葩富艷生朱紅川海枯條  
大藥千萬重緋桃修榦點綴赤日中蜀葵蠲去憂忿誰與

功萱草採摘烹煮祛煩解百秋霜鉅實垂如甕木橫  
遠引交加叢紅玫瑰葉抽綠劍端黃茸山薑直立開披泉  
貨通金錢疊遶翠羽鸞蚪龍薛荔誤入畦町非余公項助  
滌渴肺思匪躬麥門冬物物自名詞不窮願當我意乃  
汝容負汝不飲慙衰翁

過皇甫侍郎

丈人幾八十歲晚益窮經陰陽判九六天地環丙丁  
初若發泉穴漸已澄滄溟所寶非世有願充天子庭  
問我久京國鬢髮何星星無乃矜才能吐論生風霆



不爾負絜脩揚眉自娉婷昏翳本來性憔悴百歲形  
子知大方家真精潛杳冥萬化一相遇起滅如秋螢  
而於須臾間計較壘與瓶膏銷見遠照木燼聞餘馨  
唯公豺豕誨敢怠奉奉聽追思嚮踐歷媿汗曾未停  
决然趨所適金刀貴發礪去矣汗流駛薰風送揚舲

### 南都思杜祁公

祁公清德老在昔相先帝青雲吐論高白壁持身銳  
待俗無町畦取人兼揭厲甘貧安車後直道洪鈞際  
每聞天下士行業若材藝未見比調饑况乃挹襟袂

蚤嘗登公門顧昧叨末契謂有金石姿良工心彫礪  
仰瞻通德衢獨立耆英第所居名也評書草聖優煮菘雲  
腴細遺墨秘巾篋感激君子惠悲風吹白揚佳城茲  
久閉聲名與滌渙東流無已歲

### 鄴陽行

春炆書大水災患古所評去季積行潦田畝魚蛙生  
今歲穀翔貴鼎餗無以烹繼亦掇原墅草萊不得萌  
剝伐及桑棗折發連簷薨誰家有倉囤指此爲無孛  
頭會復箕歛勸率以爲名壯強先轉徙羸瘠何經營



天子憂元元四郊揚使旌朝暮給餽粥軍廩闕豐盈  
殍亡與疫死顛倒投官坑坑滿棄道傍腐肉犬豕爭  
徃徃牙食噉欲語心冤驚荒村但寂寥晚日多哭聲  
哭哀聲不續饑病焉能哭止哭復吞聲清血暗雙目  
隴上麥欲黃寄命在一熟麥熟有幾何人稀麥應足  
縱得新麥甞悲哉舊親屬我歌鄴陽行詩成寧忍讀  
期秦伯鎮不至

高人懷真趣每欲棄祿仕超然外造化邠復顧妻子  
有田給饑寒有路出生死儻得自由身休隨榮利起

或聞毫郊滂族大無餘米且持州紱去官廩尚可指  
何時當歸來焚香朝玉几

會亭遇孫資政孫公赴闕公致仕已七年時君  
歸將有西鄙之任

志節雖落落不能無謫毀壯年自雄豪末路遽顛委  
衆口方叢嘈卽欲置之死公甞爲大臣沉寃不辦理  
恭惟 仁宗聖散地而後已新治甬上居閑逸安暮  
齒恭惟

今天子繼照大明是問公何處在勉哉爲予起使者



臨其門將駕不容俟滔滔汙流急行舟姑少止長堤  
榆柳淡夜涼襟帶褫語終求其要茲事殊可喜朝庭  
英俊林豈無人器使謂公先帝臣擢任刷前耻唯公  
體上意畢力荷恩紀富貴安足論清心寂如水古人  
老益壯忠義在所指况復千載遇功名邁良史

泗州登馬子山觀漕亭

廟社奠東都恃德非恃險聚兵三十萬待哺無容歎  
西有砥柱峻菽麥不踰陝齊魯糧食艱灞水不激灑  
唯餘汙渠利直賁長淮隲歲輸六百萬江湖極收歛

輓送入太倉因陳失蓋弁將漕苟不登汝職茲爲忝  
或謂取太多六路有豐儉其間一不熟饑殍誰能掩  
一旦俾之粟是人意常憚區處失其宜斯言反爲玷  
甞欲請增戒革季亦須漸連營今飯稻香美若菱芡  
因循未易論官曹畏書檢虛亭一臨眺比比危檣颭  
來從數千里歲時空冉冉雨餘山氣淨黛色淺淡染  
夜昏漁火出倏忽電光閃須臾月色空水面鋪寒簾  
相逢喜道舊城柝屢移點因語發長謠誰能刊琬琰  
和荅孫推官久病新起見過



去季大暑過京口唯子見過牛馬走氣溫貌古風骨  
粹如入魏國逢軻叟前趨王事難少留兀若洪鐘未  
遑扣窮秋忽聞感疾恙鬪蟻入床榻左肘天生賢者  
固有待豈得數奇而不偶勿藥之喜旣和平大變快  
噉飲幾斗神明復還方才靜萬卷舊書仍次部新季  
於已無職事雖欲耕田不盈畝輕舟將覽吳中春獨  
信檣烏泐霞藪知子玉趾遠臨訪倒屣出迎唯恐後  
山堂永日接言詞楚萍色味兩俱剖自云君命入巖  
幽顧此一身縈組綬病軀未堪事刀筆野性如何屈

杞柳寧甘貧薄且晦處終歲窮經徒皓首陶家埏埴  
以爲器其大如甕小如缶昔人知命斯上通動靜以  
時隨所有我聞子論心惻惻儻或祭天必薪樵大篇  
短韻時見投開霽清暘穿戶牖強抽鄙思荅長譎脂  
澤陋澁容益醜錢塘風物湖山好與子相從頻載酒  
一水汪洋暮日浴千巖轉側朝雲嘔放懷方外聊自  
適舉杯相屬起爲壽美哉此樂世難得勿話歸期論  
子丑

丙午二月十二日雜言



仲春一浹我生之辰紀歲之行五十有五慈親是時  
九十二稱觴獻詩壽於膝下協韻曾公滿前侑以詞慈  
顏強飲至酒所我今鬢髮白垂絲揮拂萊衣輒起舞  
願親長年無窮已願兒強健典州府不富不貧正得  
宜如我奉親難比數

和王學士水車

辰鳥正中春事農農夫入田布嘉種田中白水極瀾  
漫鷺翅群鴛魚鬣聳扶持水車倚塍畔翻翻龍脊超  
雙踵日在天中人在野脫粟未逢心益恐婦姑晚餉

猶德色童稚伺餘窺饁籠夏苗欲長苦焦枯又送微  
波上層隴傷哉作勞無蚤夜歲終羸饒音甬凡幾桶秦斛

也豐年遺秉尚或歛一有不登皆散冗賦田無利從  
來遠索息巖於公上奉富者不耕耕者饑後民權枋  
雄豪總錢塘風俗本夸奢上商射利尤加勇丁男特  
壯走長街僕奴意氣金銜駛方春遊女湖上行舉首  
唯愁釵插重笑汝田家弄水車何不乘時作光寵

四月八日西湖觀民放生

盈舟載魚蝦投瀉清波際應無校人欺獨行流水惠



非求升斗活終免螻蟻制江湖自相忘洲島亦環逝  
脫淵思曩戒嗅餌省非計爲生豈不幸萍藻庶可翳  
和王學士芍藥

粲爾芳艸葉孤根當砌植違春已自分薰風猶借力  
艷艷朝日光紛披照顏色持之遺佳人歲久香不息

宋蔡忠惠文集卷之三終

宋蔡忠惠文集卷之四

明後學吳興蔡善繼伯達甫校

律詩

和御製觀三聖御書

聖業存功德宸毫冠藝文勢開千里浪光動九天雲  
法駕乘時至仙都與世分皇心欽寶訓求治益精勤  
群玉殿賜宴

臣蒙恩宣召至龍圖閣觀書群玉殿曲宴伏以數  
千季間無此盛事臣忝職翰墨榮遇非常謹賦拙



詩一首備載本末上干聖覽臣無任戰灼之至

治道承炎曆皇基亘萬季淡仁涵海嶽至德著坤乾

文物歸元首臣隣必巨賢蓼蕭思及下奕葉力追先

昕色方群進臚音忽四傳衣冠紛雜選臺殿鬱蟪蝓

嘉祐七年十二月二十三日詔宰臣以下龍圖天章閣觀三聖御書寶字崇三聖瑤圖

祕九天榮河祥氣徹昭漢曉光旋磊砢珠璣在崢嶸

歲月遷家聲終卓越上意益恭虔書觀開舖首又幸寶文閣

閣作飛白字召臣寮觀人賜一軸兼賜紙筆墨各有差宸毫落彩牋烟雲初不

定鸞鳳互相鮮拜賜兼金重珍藏尺璧全人人皆自

得事事獨超前睿藻敦風教賜御詩一首命冥搜出

化權來從玉山府遠過柏梁篇迴馭臨高館賜宴群

推恩錫廣筵迷蒐遊帝所休應動星躔申命嚴樽俎

二十七日幸寶文閣召宰臣以下觀太宗游藝集瑞物十三種仍賜御書宴羣玉殿宣諭太平無事令羣

臣盡醉新章被管絃千齡叨際會曠古絕夤緣大施難

輸報精誠第祝延唯應歌盛美樂石可摩鐫

上元進詩

臣言臣伏覩法駕特御端門宣諭臣僚上元觀燈

不為遊賞蓋與民共樂也臣職在文字恭惟德音



宣布睿旨感詩人揄揚盛美之意輒成短章上干宸覽臣無任惶恐戰越之至

疊聳青峰寶炬森端闈初晚翠華臨宸遊不爲三元夜樂事全歸萬衆心天上清光開夜色人間和氣閣春陰要知盡作華封祝四十季來惠化深

夢中作

季十八時入京就進士舉過舒州相成夢中作

白玉樓臺第一天琪花風靜彩鸞眠誰人得似秦臺女吹徹雲蕭上紫烟

久寓悟空院刹行而書之

寂寂精廬切半空古原高下稻花中蓮趺披素輕雲梵花萼雕紅細雨宮孤鶴睡迷千樹月斷蟬吟曉五更風心縻尺組遙相謝歸馬南蹄疾似蓬

漳南十詠

龍臺

試看初日照龍臺白玉高堂錦障開樹色一番連雨爭溪光幾曲抱山來雲歸淡洞天形瘦風落前村笛弄哀擬結青樓遍題詠思王何吝斗量才

城東水閣



亭上芳樽惜別人  
亭前斜日欲歸輪  
傷心定是丹楓樹  
拂面空來紫陌塵  
歲月暗驚山色古  
愁情長與草芽新  
何時此地迴飛蓋  
寂寞欄干又一春

南溪

近郭溪光綠好裁  
雨晴波底敞樓臺  
蔭隄佳樹千圍合  
掠水輕舟一箭開  
驚釣寒魚拖糝去  
忘機閑鳥信潮迴  
官餘擬欲祛塵意  
書遍平沙我獨來

滿月池亭

有客高懷脫世紛  
碧灣晴檻樂遊頻  
無心自合波中月  
照影誰分鑑內人  
莎砌亂蛙爭噪雨  
杏梁雙燕欲留春  
長季老厭趨豪末  
來揖孤雲作上賓

西湖

湖上山光一筍青  
佛宮高下裹崑崙  
烟收水曲開塵匣  
春送人家入畫屏  
竹氣更清初霽雨  
梅英猶細欲殘星  
吳船越棹知何處  
柳拂長堤月滿汀

圓山廟

風雅遺芬嶽有神  
此山靈祀越千春  
彩毫佳句言猶在  
翠剡新詞意未真  
絕頂黑林長帶雨  
曲崖飛磴不



留塵瘴雲收書秋田熟跋境肴漿再拜人

陳將軍廟

曾憑水柵誓長江報國全軀事不雙力屈已嗟關羽  
歿勢孤猶笑李陵降宿墳古劔龍腥匣壞壁靈旗獸  
纏扛神理高高人意近楮錢祈福暗塵窻

白雲亭

雲擎翬檻翠崑巔石老松皴不計年舉世覺來空白  
日幾人遊去上青天醉看絕壑都無地嘯倚清風只  
恐仙花晚春殘無限意他時迴首定依然

齊雲閣

紫閣青梯壓翠岑春情秋思共登臨雨嵐供眼橫千  
掌星漢垂簷直半尋忍別朱欄真俗吏獨棲珍樹祇  
仙禽當年人事多奇尚擬托巖扃息寸心

東郊

蕻惹晴雲釀雨時東城無處不芳菲斜坡草短孤麋  
卧平隴麥深雙雉飛炤塢亂花驚客眼胃空輕絮點  
郎衣年來意氣多羈束無復長揪帶酒歸

別宋判官



縷縷青陰拂去  
梨花狼藉顛春寒  
年光別緒侵人  
鬢莫向離亭仔細看

### 城南春會

陰雲薄薄地無塵  
清曉城南集畫輪  
睢苑卽時裁雪  
霰潁川連夜聚  
星辰山眉帖漢晴  
光擬鶯舌尋風碎  
語真芳草有情迷  
謝客落花無處問  
秦人樽前莫厭  
歌醒耳世上偏饒  
淚滿巾嘉意未闌  
繁盛減東皇底  
事惜殘春

### 序賓亭

師律先憂寄朝家  
此得人門庭環劍  
佩胸膽貫星辰  
今已閑戎略疇能  
卜宴申樓高休暇  
日臺迥厭登春  
珍館瑤甍舉璇題  
寶篆新鴨欄迴頭  
頸龍壁活盤鱗  
夾幕寒波顛前峰  
古黛皴始知仙有  
路盡恐世無塵  
武馭來金虎儒簪  
下石麟機分榮辱  
主解序去留賓  
揖讓盈三魄雌雄  
競一神氣橫飛客  
箭歌協大夫蘋  
萬古浮雲片勞生  
斷梗身卽時權未  
已往事夢非真  
席久疑枯海琴么  
似隔隣釭花明雨  
暮甕耐壓霜晨  
鷗動殘絲柳鱸肥  
滑線葺晴霞上丹  
葉熟粉護青筠



賦景呵吟筆揮談密醉茵流季祇容易嘉會可因循

望春詞

霏霏細雨勒梅黃一望春容十斷腸平蕪古柳青青  
遍獨使潘郎兩鬢霜

落花

何事蒼苔數點紅曉來花片落春風可憐春色蕪花  
盡今古此情無處窮

耕園驛佛桑花

溪館初寒似蚤春寒花相倚醉於人可憐萬木彫零

盡獨見繁枝爛熳新清艷夜露雲表露幽香時過轍  
中塵名園不肯爭顏色的的天紅野水濱

溪行

穠氣已寥落清溪纔此行船移酒盃側魚得鱸刀鳴  
日色浮蕪動風痕滅又生從知隱者趣不獨傲榮名  
淨衆院嘗荔枝

霞樹珠林暑後新直疑天意別畱春京華百卉爭鮮  
貴自是芳根着海濱

奉酬王知縣賞春不與以詩見贈



仙陬翠觀盡繁英朱白相兼照眼明池浸嵐光生晚  
碧鳥驚人語斷春聲談諧遽喜開懷久醜陂終慙走  
筆成佳致可能陶靖節庭柯斜眄獨忘情

喜第及第

里閨高高祖德新曾庭詩禮孟家隣連登桂籍青袍  
客共拜萱堂白首親倚國精誠明火玉照人清節對  
霜筠童襟開慧盈書館漸喜芝蘭在處春

西郊

曉蓋西郊道春光極

或作酒

太虛村風香晚稻溪日曝

寒魚雀噪饑鷹下山空病木踈歸期優抄歲反思望  
吾廬

三月詣陳通民

振木凌曉色霽野縱遊韁莓潤溪雲重春淡山露香  
赫幽風更細院靜日偏長曾是天皇外相從識酒鄉  
次韻翠岳寺

攬蔓巖扃峻交繩寶界平斜峰約雲勢乾樹起秋聲  
泉檻妨蛩響霜樓助月明冥筮無洒落警句一何清  
夏晚南墅



夏竹侍前楹涼襟折舊醒疊雲封日茜斜雨著虹明  
魚動池開暈蟬移樹戒清葭洲烟向暝鳧鷺自相迎

蕪陰樓上

野馬沉寒氣神禽度細風斷霞天共紫斜日樹齊紅  
山口橫虛釣江隈跋遠艤解窮千里目爭奈思無窮

抄秋湖上

舊暑侵涼已分銷烟疎丹樹見斜橋千千露竹全瀟  
灑一一風蟬共寂寥菰米熟汀來客燕芡絲分水避  
歸橈月鬼未上東城角誰向東城與下招

和陳殿丞南州新詠

寶坊高閣遍憑欄曾是芳辰得未閑日上天容低接  
海風輕湖底倒搖山夜淡佛火寒星外春過人烟暗  
樹間無意孤吟採幽致異時行橐斷空還

通源驛別顏茂才

躍馬東來不記時酒醒寒色入征衣垂楊官道人爭  
去落日郵亭別我歸

陪尹子漸申安禮宿香山寺

二月已強半尋春登石樓山光侵暮變草色到雲休



歸鳥沉崑際行人過樹頭劍苔看石碣因火認漁舟  
漸夜灘聲惡憑虛屋勢浮乘閑聊自適觴詠屬吾流

正月四日

今朝纔見雪泥乾日薄雲低又作寒家山千壘何時  
到溪上梅花正好看

春曉

瞳瞳初日注窻明窻外雛鶯乳燕聲東風氣味濃於  
酒曉夢魔人似宿醒

晚色

晚色在何處樓高天宇低閑雲無去住歸燕自東西

過天津橋

日暖溪平水漸銷水聲纔下內前橋山川滿眼閑宮  
殿草樹迷人舊市朝每向尋春偏有意却成懷古更  
無聊洛陽平昔多豪傑惆悵埋魂不可招

讀離騷經

莫怪靈均戀楚濱可能臣子外君親精心獨去珠無  
類飛語潛來箭有神宋玉招魂推意遠楊雄流涕掩  
書頰江邊自是修門路嗟苦先生隕此身



暮春登南門

麗譙高倚晚天霞滿目平臯盡物華十曲胡笳催鼓  
砧三重湘耐倩旗誇連江急雨送歸燕拂地輕風移  
落花強凭欄干還自問此情何處是邊涯

和丘提刑寄湖南賈度支

何處多離感山郵霽野光清吟貫騷雅遠意屬荆湘  
霜樹呈秋色風蘭生晚香使軺偏倚望摘藻寄回腸  
和丘提刑聞新鴈寄賈度支

翔鴈來江渚秋容在遠空幾聲疎樹外一字斷雲中

虛館垂簷月平臯敗葉風裁詩託幽思幽思更無窮

遊龍門香山寺

彩閣縈林轉蒼崖隔水開龕明千像日波起一灘雷  
綠淺春前草香餘臘後梅背人驚鷺去將雨好風來  
雲氣隨衣袂嵐光入酒杯清遊知不屢欲下更徘徊  
聞福昌院春日一川花木最盛

聞道春深多物華遙憐春物思無涯烟涵樹色相依  
好山擁溪流一帶斜休問主人先看竹只隨漁叟便  
逢花憑誰畫得當時境持去江南細與誇



山前溪上最宜春。千樹夭桃。一雨新爭得。扁舟隨水去。亂花淡處。問秦人去。

登府店福昌山閣

危磴通高閣。登臨境過清。雲開千岫出。雪霽一川明。斷鴈來孤影。遙泉落細聲。野烟依竹見。溪樹與橋平。已助騷人思。空搖遠客情。扁舟如可泛。歷歷是江程。雪中不見女兒山。宜陽南路是仙山。雪擁雲埋杳靄間。洗眼來看無處覓。不知可復在塵寰。

登三鄉寺閣

歷覽宜陽道。披軒臨朔風。地疑塵世外。人在畫圖中。巖曲踈鐘荅。村前小犬通。水烟寒更白。山氣曉微紅。遊宦真浮梗。流季似轉蓬。長懷無所寄。盡日送歸鴻。嵩陽道中

千里動秋意。縈迴上古原。山樵斷晚日。野火着寒雲。鐘磬出隣寺。牛羊下遠村。振衣歸去好。塵事莫知聞。訪陳處士

橋畔脩篁下。碧溪君家元在此。橋西來時不似人間。



世日暖花香山鳥啼。

題建造寺奉先院

日照溪山生翠光  
春深花草雜幽香  
登臨誰會遲留  
意門外塵埃去路長

送別陳比部

祖向西郊道川原盡  
閣臨燒痕經雨活  
樹色入溪深  
斜日明春態孤雲感客心  
何人知別意重把酒盃斟  
城西金明池小飲

曉出都門外名園連翠屏  
融怡春物動蕭灑塵慮醒

輕風送花信遠水涵空青  
舊遊無處問芳樹隔重扇

又七言一首

城西禁籞宿烟收  
霜薄朝寒上蜀裘  
佳樹得春生意  
動平池受日翠光浮  
十季歌笑驚前世  
滿眼風華是舊遊  
從此曲江芳物好  
定知重到更遲留

送張太傅還鄉

置器功成佚退身故園  
南望整車茵青冥直上無餘  
事白首歸來有幾人  
門外離筵晴日曉  
江邊行路雜  
花春橐金均散心如  
水冢樹重攀淚滿巾  
盃酒相逢



耆舊少山川不改歲華新從公几杖何由去更祝天  
季比大椿

寒食樂詞

皇州令節已藏烟帝渥乘時錫廣筵和氣去添春色  
重恩光來助日華鮮千聲鳳吹朱門裏一番花香穀  
雨前更喜簪裳嘉宴日親逢千羽治平季

喜歐陽永叔余安道王仲儀除諫官

御筆新除三諫官士民千口盡相歡昔時流落丹心  
在自古忠賢得路難好竭謀猷居帝右直須風采動

朝端人生萬事皆塵土惟是功名永遠看

送楊殿丞通判睦州

蒼崖中斷一溪來迤邐人家向水開盡日烟雲迎旆  
去滿瀧鏡吹引舩迴虛齋晝夢鳴禽下別塢春遊盡  
角催莫怪杜郎題處少更畱佳致待清才

宿楊州

瓜洲堰埭阻行橈更等江頭後信潮獨背殘燈數歸  
路風傳寒柝夜迢迢

廣陵



廣陵歸客嘆飛蓬懷古傷離向此中前世翻波那復  
問十季彈指已成空樓頭畫角催殘日城上寒鴉噪  
晚風井徑蕭條人不見又隨潮信度江東

馬奴周晬思之因成

馬奴今日方周晬昨夜迢遙夢到家盤裏應知心所  
愛樽前唯祝壽無涯伊嗷弄語群兒學踉蹌初行乳  
毋誇獨上楊州津館望江山搖落去鴻斜

聞鴈

霜風吹鴈入南雲千里征人枕上聞欲問梁園近消

息月沉星轉五更分

江頭別杜殿丞

楊子江頭南北路木蘭船上往來人季華滾滾東流  
水世事勞勞薄宦身回首天涯成遠別忘懷物外自  
相親津亭共起憂時嘆重記津亭淚滿巾

題金山寺

畫梁詩板暗流塵水石魚龍萬句新誰識高僧最淡  
意慈航長護過江人



宋蔡忠惠文集卷之五

明後學吳興蔡善繼伯達甫校

律詩

題僧希元禪隱堂

院在蘇州城中

遊錫遍他方歸休靜默堂孤吟時有得諸念若爲忘  
剝竹戒庭翠煮茶生野香雲山莫騰誚心地本清涼

經錢塘故宮

廢院蕪城裏故宮行人苑外問秋風當時歌舞何年  
盡此意古今無處窮往事蕭條隨敗葉客情迢遞寄



孤鴻扁舟欲去更回首寒樹蒼蒼夕照東

經林逋舊居 二首

修竹無多宅一區先生曾此隱西湖詩言不喜書封

禪亦有餘書補世無

逋詩云茂陵異日求遺草猶喜曾無封禪書

山色凝嵐水色清山雲長與水雲平先生來舉持竿  
手釣得人間亢俗名

離錢塘

迎潮小舸滿旗風回首津亭暮靄中惆悵今宵歸去  
夢迢迢直至海門東

至睦州

一帶滄波兩面山扁舟中去幾時還浮生多半在離  
別此意明知未肯閑

題杉溪驛 二首

宵行避酷暑山路乍縈迴明月正相向涼風時一來  
幽林潛物怪秘洞蓄雲雷豈敢憚勞苦畏途誠可猜  
又

隘道臨溪壑俯闌千仞強驚禽忽獨去怪石偶成行  
月下芙蓉色風前糴稬香反慙群動息幽意更徬徨



宿延平津

鳴籟蕭森萬木聲濃嵐嵐環合亂峰青樓臺矗處雙溪  
會雷電交時一劍靈曉市人烟披霽旭夜潭漁火鬪  
寒星畫屏曾指孤舟看今日孤舟在畫屏

呈沈子山

邈字子山時知福州

荷葉新詞天下工玉人垂手倚秋風一聲清唱穿雲  
去斜日烘簾曲未終

六月閩溪荔子丹新秋猶喜薦雕盤自嗟千里歸程  
遠不得繁枝雨後看

題福州釋迦院幽幽亭

有序

東陽沈子山前此十季爲候官縣政休乘間頗自  
娛於登臨之適得院之東北隅地方數丈誅草茅  
而列樹石時遊哦於其所因命曰峻青臺今復爲  
郡太守其僧曰吾使君儻一來執事者可暴露乎  
並臺作亭以除風雨子山至其下又名之曰幽幽  
亭邀予題牘以揭之遂作詩以賦山川之美而序  
以紀其始焉

路盡得佳賞川原何爭明周圍地形壯灑落世塵清



青郭千峰起涵空一水橫風帆人共遠潮嶼歲重耕  
曉市炊烟合孤庵汲道縈俯窺崑鳥過微認野雲生  
香氣林端出秋容物外呈表閑幡弄影覺靜磬傳聲  
官舍今稀訟轡車此駐行唱篇知寡和君世負詩名  
題漁溪驛

晚上碧峰亭

城頭近晚忽開晴有邑皆鮮是物清地勢四來州  
昔奉同向臆中迴曾遶欄干折蚤梅今日獨來攀舊  
樹風翻黃葉下蒼苔  
向山圍一罅水東行乘風歌吹無時已面日樓臺觸  
處明不比兒曹誇衣錦自緣恩與養親榮

春潮

納納春潮草際生商船鳴榔趁潮行封書欲寄天涯  
意海水風濤不計程

病中偶書

已感節候變物態舒陽春那復壯季意如今多病身  
爭室焚香久烘爐煮藥頻神歡百慮解銷盡眼前塵

又



雙蓮月窟  
宋苑忠惠公集五卷  
行季三十六幾是半生人舉止不入俗清修難厭貧  
宴坐爐烟暖微醺甕耐醑前看蕭管輩未免作埃塵  
和王介夫遊西禪兼呈黃承制  
山城只有四圍青海國都無一點塵荔子丰標全占  
夏荷花顏色未饒春水邊清吹傳觴久路上殘陽立  
馬頰不是閑來誇景物欲將謠俗寄主人

興化軍曹殿丞寄荔枝

厚葉纖枝新絳囊使君分寄驛人忙彩毫封處曾留  
意筠籠開時不減香風色甚豪應少損路程差近得

分嘗閩州縱有千千樹未抵家園氣味長

和曹殿丞寄荔枝

荔子凝丹摘曉鮮江南來路與雲連託根曾是三山  
下結實應歸萬木先鄉國遠携甘旨重宴堂分翫色  
香全清才仍更傳新唱一一驪珠照眼圓

飲薛老亭晚歸

終日行山不出城城中山勢與雲平萬家市井魚鹽  
合千里川原彩畫明坐上潮風醒酒力晚來巖霧蓋  
鐘聲歸時休更燃官燭在處紗燈夾道迎



和許寺丞泊釣龍臺見寄

釣龍臺下艤行橈  
獵獵紅旗待晚潮  
萬里征人應悵望  
一川秋色正蕭條  
雨雲來去山明滅  
風浪高低日動搖  
有志四方男子事  
莫懷鄉國便魂銷

十一月後庭梅花盛開

迎臘梅花無數開  
旋看飛片點青苔  
幽香粉艷誰人見  
時有山禽入樹來

日暖香繁已盛開  
開時曾遶百千迴  
春風豈是多情思  
相伴花前去又來

發篋得亡友書札

宿昔重交義零落今誰存  
舊情留紙札永恨入丘墳  
世味薄於水生涯空似雲  
撫孤無力及流淚復何言  
寄荅汝州王仲儀待制

汝水閩山道路長  
行郵時復寄新章  
諫垣笑別三年迅  
病枕魂飛萬里強  
烈火未應焚玉石  
埋輪曾是問豺狼  
主恩未報頭生白  
羞見龍泉百鍊鋼

正月十八日甘棠院

上元纔過去尋春紅  
白山花粲粲新似喜  
使君初病



起隔欄相向笑迎人

天氣和柔酒更醅緩歌花底正青春狂花有意憐醉  
客撩亂飛紅滿一身

無奈閑情着物歡更愁花草便闌珊天紅嫩翠宜燈  
燭放散笙歌靜裏看

福州寧越門外石橋看西山晚照

寧越門前路歸鞍駐石梁西山氣色好晚日正相當

九月朔予病在告書夢遊洛中見嵩陽居士留

詩屋壁及寤猶記兩句因成一篇思念中來

續爲十首寄呈太平楊叔武

天際烏雲含雨重樓前紅日照山明夢中兩句嵩陽居士

今安否青眼看人萬里情司門員外郎王益恭年四  
十餘致政居洛中自號嵩

陽居士

修竹蕭蕭曲欄前清泉瀟瀟小池邊琴中一弄履霜

操人靜當庭月正圓予爲留守推官新作綠竹堂  
王勝之劉伯壽多會宿彈琴

過雨池塘涼風蚤落花門戶亂紅多松亭石上題名

處誰剝莓苔看王相宅號史館園嘗與  
府僚遊宴題名石上

廟下春行香霧合觀中朝茹藥牙尖故人別後無消



息荒草生墳白露霑

嘗與尹子漸遊嶽廟寺觀今子漸亡矣

霜後丹楓照曲堤酒闌明月下前溪石樓夜半雲中

笑驚起沙禽過水西

從尹師曾宿香山石樓

韓王宅裏酒千壚范帥園中花萬株行樂主人今已

矣春風還是舊時無

趙韓王宅有藏酒百千器范太尉宅花最多

名花百種結春芳天與穠華更與香每憶月陂隄下

路便開圖畫覓姚黃

月陂張家牡丹百餘種姚家黃為第一

草白霜晴鷓眼開原頭遊騎四邊來枯叢鴟鵂休驚

噪日暮分持走兔迴

曾權洛陽縣屢陪諸君出獵

履道園池竹萬竿竹間池際笋斑斕當時酒所誇文

戰今日誰登上將壇

普明寺乃白樂天履道第水竹最佳數為文字飲

白馬寺前冠蓋盛送行賓友盡英豪耿丞血染邊場

草留得聲名日月高

罷官時交遊送餞白馬寺耿大監丞今歿西事

題何山人大隱閣

萬井連交道中天敞靜軒由來隱鄜市全勝賁丘園

目極無留賞心閑不避喧沼光搖屋動花艷出欄繁

雨霽山容靜潮生海氣昏幽人披彩檻永日對芳樽

素業名家久通醫與義存丹圖環八卦仙訣遁三元



造化今爲友，懽憂本聚門。應須超世累，宴坐此忘言。  
正月巡歷部郡侍親還家

養親方解郡，奉使又還家。遠岫鄉關近，前旌父老遮。  
揮金貧自愧，舞綵喜仍誇。特地延賓友，相期詠白華。  
方山渡口占

江上行人空自愁，壯年雙鬢已驚秋。不知風裏千重浪，何事無情也白頭。

江村

黯淡江村春日斜，汀洲芳草野田花。孤舟橫笛向何

處，竹外炊烟一兩家。

三月再還家

曉樹鄉關路，春衣使者軺。江眠聞落霰，野飯掇新苗。  
入里威稜減，寧親喜氣饒。勤勤父師教，民病若爲消。  
宿海邊寺

潮頭欲上風先至，海面初明日近來。怪得寺南多語笑，蟹船爭送蚤魚迴。

建溪桃花

何物山桃不自羞，欲乘風力占溪流。仙源明有重來



路莫下橫枝礙客舟

吳屯驛曉起

殘月依山明朧朧長烟浮水白模糊竹林繞舍啼鴉  
白石井當窻下轆轤迎吏遠傳空狀小僕奴潛報一  
錢無騶兵不管晨炊絕呵咩菴籠意氣麓

王臺驛見晚李花有感

玉京仙子愛春芳弄遍瓊枝嗅盡香祇有此花知舊  
意又隨風色過東牆

晝寢宴坐軒憶與蘇才翁會別

投涼下馬卧僧家遶簾清風卷絳紗脩竹滿前微雨  
過遠山無際薄雲遮武侯舊隱人應到

京西提點刑  
獄廨宇在鄧

州閩粵孤城日自斜解與塵心消百事更開新焙煮  
靈芽

漳州白蓮僧宗要見遺紙扇每扇各書一首

山僧遺我白紙扇入手輕快清風多物無大小貴適  
用何必吳綾與蜀羅

野老尋山剪白雲欲將清吹助南薰不堪便面張京  
兆恰稱能書王右軍



徑尺規圓比雪霜昔人何事恨秋涼  
珍藏篋笥未爲失更有明年夏日長

武侯白羽麾三軍帳前甲馬生風雲  
憐君才地亦踈薄相過書林至夜分

薄似蒲葵質更圓忽疑明月落罇前  
南堂暑氣生煩濁一座清涼直幾錢

澆白新牋卷線稜刮青纖竹纏紅藤  
可憐子夜書帷下一片圓光得未曾

堂陰壁罅蚊蚋都指麾四向先驅除  
山翁一夜穩眠睡若或論功誰勝渠

老去將携只要輕况臨炎暑遶風清  
兒童愛把承簷溜未識山家質素情

不掩歌脣向畫堂不須名筆作花房  
直應携去林泉好轉覺林泉興味長

虛堂永晝來風長石枕竹簟寒生光  
文園肺渴厭煩熱更要夫君在側傍

懷文雅儼上人

填填車馬走沙塵中有伊人離俗氛  
千里不逢京下



信五年虛斷海邊魂何窮世事秋林葉自在心靈晚  
岫雲聞道西堂今粹隱暮鐘朝磬欲何云

寄題處州朱山人幽居

之子適所遇愛此山林居禪心庭下樹仙訣枕中書  
溪明暑醉後洞暗春遊初逢疴藥籙補得意琴聲徐  
人生隨樂住世事與閑疎勿用挂雲網孤鴻翔太虛

明道中予爲漳州軍事判官晚秋嘗至州西耕  
園驛驛庭有佛桑樹十株開落繁盛念其寒  
月窮山方自媚好乃作耕園驛佛桑花詩一

首旣而乘桴東下又作溪行一首慶曆七年  
予使本路明年夏四月自汀來漳復至是驛  
花尚仍故追感昔遊因紀前事并載舊篇龕  
於西壁

使輶迢遞到天涯候館遷延感歲華白髮却攀臨砌  
樹青條猶放過牆花悲來唯見金城柳醉後曾乘海  
客槎欲問昔遊無處所晚烟生水日沉沙

漳州白蓮院予爲郡從事時多所醺遊今十有  
五年因使復來當時遊者零落殆半愴然成



宋蔡忠惠文集卷之五  
詠寄題東軒兼簡宗要上人

昔季文酒自爲情身外鴻毛萬事輕暑醉每怜風引  
夢夜歸多見月隨行重尋蘭若餘芳在却怪桑門老  
態生點數朋遊今有幾拂塵看字淚先橫

宋蔡忠惠文集卷之五終

宋蔡忠惠文集卷之六

明後學吳興蔡善繼伯達甫校

律詩

後舍緋桃

十年樹底折香葩  
蔌蔌浮光弄曉霞  
只恨無情是風  
雨直將紅片入西家

題龍紀院僧室

山僧九十五行是百年人  
焚香猶夜起喜酒見天真  
生平持戒定老大有精神  
須知不變者那減故時新



宿黃蘗聽彬長老談禪

一圓靈寂本精真誰向滄浪更問津  
欲說西來無見處奈何言句亦前塵

南劔州芋陽舖見臘月桃花

可笑夭桃耐雪風山家牆外見疎紅  
爲君持酒一相向生意雖殊寂寞同

士安飲我數盃至觀音院纔醒聞灘聲  
泉響因

畱短闕

林外灘聲砌下泉泠泠幽響靜中傳  
朝衫却染京塵

去爭得夫君醒醉眠

別邵武長史朱照鄰

竊比君侯病馱馱時看雲路忽長嘶  
十年還此同杯酒三驛剛來踏雨泥  
士行滿鄉元自好官名當世不勝低  
未霑釜粟榮新祿應上亨衢別有梯

相送三日

自漁梁驛至衢州大雪有懷

大雪迷空野征人尚遠行  
乾坤初一色晝夜忽通明  
有物皆遷白無塵頓覺清  
只看流水在却喜亂山平  
逐絮飄飄起投花點點輕  
玉樓天上出銀闕海中生



舞極活溶態聞餘浙瀝聲客爐何暇煖官酤去聲未能  
醒薄吹消春凍新暘破曉晴更登分界嶺南望不勝  
情

華嚴院西軒見芍藥兩枝追想吉祥賞花慨然

有感寄呈才翁

辛卯四月

吉祥亭下萬千枝看盡將開欲落時却是雙紅有淡  
意故留春色綴人思

烘簾微照自生光吹面輕風與送香誰把金刀收絕  
艷醉紅淡淡上釵梁

的的名花對酒樽欄邊沉醉月黃昏今朝關外尋蘭  
若忽見孤芳欲斷魂

崇德夜泊寄福建提刑章屯田思錢塘春月並  
游

夙昔神都別于今浙水遭故情彌切到佳月事追邀  
太守才賢重清明土俗豪犀珠來戎削鉦鼓去啾嘈  
湖樹涵天濶舡旗習日高醉中春渺渺愁外夕陶陶  
新曲尋聲倚名花逐種褒吟亭披越岫夢枕覺胥濤  
論議刀矛快心懷鉄石牢淹留趨海角分散念霜毛



雙魚五齋  
鱸膾紅隨筋

予之吳江

瀧波淥滿篙

君往嚴瀧

試思南北路燈

暗雨蕭騷

嘉禾郡偶書

盡道瑤池瓊樹新仙源尋到不逢人陳王也作驚鴻賦未必當時見洛神

讀宿州天慶觀門扉仙篆有感

玉骨霞衣帝所遊案前香氣與星浮無端醉語落塵土一過人間四十秋

送張處士

垂垂秋雨沒羈泥經書門前無馬嘶乘靜因題送行什江南歸思已妻迷

梁園塵土着人腥不似淮山照眼明愛君心迹曾無繫一片孤雲去就輕

溫成皇后挽詞

二首

紫極騰軒曜青春委薜顏雲輶何處去金殿幾時還仗下邊簫咽陵中夜燭闌六官哀送返疑是夢魂間

又

翟綵開新禮金文易大名真游上仙路故物感皇情



月落辭丹禁春前引素旌宮闈鳴挽鐸不是珮環聲

司徒侍中宋宣獻公挽詞 五首

重器推隆棟馳光逐逝川人應騎尾宿歲亦在辰年

文思精天下忠謀盡帝前唯無豐室累清白是家傳

又

申命增華袞遺忠動紫宸世風存令子暮哭有慈親

復辟前言在論兵密疏陳如何年不永無路問蒼旻

又

懷道初名世乘時遂致君平分百年筭中據兩台文

行髮連寒樹疑笳上晚雲路人那得識揮涕指幽墳

又

洛宅初開府非才辱顧隆遺思謠俗在餘論宴堂空

已矣蒼生望嗟乎吾道窮豈惟懷舊德一慟向春風

又

去歲洛城東公歸秉樞務今日國門西轎車行哭度

同此晚春節依舊西山路千古訣幽明一年纔旦暮

遠恨寄山川餘哀慘雲霧平昔送公詩何言歌燿露

哭賈少卿 庚辰年自潭州謫所遷少卿知廣州未行卒



雙溪集卷之六 宋蔡忠惠文集卷之六 五 三百  
畫嶼南度謫長沙粵海新思路更賒子日鵬來知主  
去辰年龍會爲賢嗟猶多婚嫁先捐館無復田園可  
寄家曾是德公推獎厚一觴何處酹魂車

別顏慥下第

四上不登第漂流二十年依依去國恨杯酒春風前  
和杜相公謝寄茶

破春龍焙走新茶盡是西溪近社芽纔拆緘封思邊  
傳爲畱甘旨戒藏家鮮明香色凝雲液清澈神情敵  
露華却笑虛名陸鴻漸曾無賢相作詩誇

謝杜相公詩

伏觀宮傅相公精詞健筆輒然成詠敢觸冒戰鋒  
但伸勤勤之至

謝政閑宮傅當年老相君詩情通造化筆力作風雲  
是則經綸手施於淡泊文捧窺心感悸無路候公門  
銓舍後軒

秋欄疎索水蒨花坐見花邊日向斜莫問幽人超世  
訣卽心無累是仙家

閣下晝眠



急雨初收宮殿明紅薇花落暑風清忽傳午正驚殘  
夢寂寂西軒喜鵲聲

戲荅王仲儀

零落黃花動節辰送行杯酒感風塵誰知最恨張京  
兆畫徧修眉不示人

哭石曼卿

仕宦晚益困忽驚朝露晞嗟嗟命不偶事事志多違  
直節未嘗屈英魂何所依有材真國器無悶卽天機  
前日猶言笑今亡果是非城南春滿路空見素旌歸

銅雀妓

十五燒香總帳前幾多幽怨入危絃誰知千載臺傾  
後何處西陵有墓田

城西射弓挺之以病不至簡示新詩有唯應欠  
我涓城歌之句謹吟一篇以荅佳意

雪後西郊物外清官閑乘興此閑行出門疎樹無塵  
色入內流渠帶野聲近臘酒醪香更醜得風弓箭力  
還生知君病起心猶壯獨背舡窗唱涓城

汾陽夫人挽詞

二首其夫李留  
後端懿國甥



福偶天家出賢名戚里推朱顏不待老萬事却成悲  
宿露霑新隴秋風過舊帷誰歌均一德傳繼召南詩

又

借有百年在都如一夢迴幻生還復滅仙去不重來  
樂色閑霄院衣香祕夜臺行人知令淑哭送侍兒哀

泰靈園書事

檻外珍叢砌下泉祥符天子泰靈仙忽逢野老臨池  
水自剪殘花趁歲錢

上元天仗欵琳房靈圃遙傳玉殿香要識年年桃李

色不關春力是恩光

讀太平告身

綾紋金彩射星霞潤墨新騰玉署麻不用著心驚寵  
辱去來元是坦空華

因書荅河東轉運楊樂道

前歲君提嶺外兵國門南路送君行出來成事多天  
幸直向危時見世情勉力朝廷論大計甘心江海就

私榮

予請罷開封府出知泉州

牢愁應解侵人骨未老先教白髮

生



楚州聞晚角有懷

欽天門外警場開

郊宮有欽天門

盡角千枝疊鼓催今日淮

邊孤壘畔晚風時送數聲來

過真慧素上人院見紅薇盛開因思西閣後軒

數株遂成短章寄翰林原叔八丈禹玉閣長

兼書真慧壁間以記所遇

八月吳天覺蚤涼翠叢初析碎朱房繁枝欲卧不勝

力落片將飛猶自香西閣二年臨畫彙金刀一夕掩

春芳

嘗令花工以綠為之殊逼真也

欄邊想像頻回首漸覺星垣迥

漢傍

杭州訪吉祥璘上人追感蘇才翁同賞牡丹

曾乘春飲遶花畦花底餘香入燕泥剪處佳人傳燭

下歸時明月到雲西重來草樹驚秋色零落交朋感

舊題若使他年逢勝賞一觴知復共誰携

寶月法喜堂

少悟浮圖法因傳法喜名於人無厚薄知己盡豪英

藥舍朝爐暖碁窻夜燭明性懷元自得未用厭逢迎

過泗州鎮

衢州道中是年冬十二月室家永嘉郡君葛氏亡逝



二六五季間三廻共往還那知臨白首相失向青山  
想像音容在優尋鬢髮斑平生多善行應不下塵寰

丙申元日過浦城西陽嶺

曾侍天王玉几傍累年侍捲簾袍色殿中央重霄未

徹宮縣樂上宰初持萬壽觴曉日半臨幡影轉春風

偏送佩聲長今朝千里穿雲嶺喜奉親輿返故鄉

宿漁梁驛

庭樹疎疎河漢低瓦溝霜白月平西寒鴉不奈單棲  
苦落泊驚飛到曉啼

過南劍州芋陽舖見桃花

七年相別復相逢牆外千枝依舊紅只有蒼顏日憔悴  
奈緣多感泣春風

見勻親抄書涕悼卷末

得汝抄書心自喜古來清白紹家難誰知向老秋燈  
下一見親蹤不忍看

寓居興化轉運廨舍

病惱連春夏居閑意味長海風生永晝山雨送微涼  
書軟梅蒸潤衣巾荔實香塵緣消遣盡物我兩相忘



丙申五月遊興化西門上溪

尋溪因過上溪遊雨後溪渾水亂流因俯堤松却飛  
蓋為聞山鳥輟鳴騶平田穰稷青雲合滿谷芭蕉碧  
玉抽開濟無功須蚤去故時瓜隴有通侯

伏蒙評事宋文分貺家園丹荔世傳此樹已三

百年黃巢兵過欲伐之時王氏主其樹其媪  
擁樹願并戮巢兵為之不伐今雖老矣實益  
滋繁味益甘滑真佳樹也因成短章用酬厚

意

齋館從容接燕申每臨佳樹走觥巡兵鋒却後知神

物年壽高來况主人竝賞昔聞思故友公嘗言陳太監方諫議及

太卿竝曾會賞分甘今喜奉慈親豈唯特祝公難老兼欲靈

株比大椿

伏蒙評事阮丈手授秘文輒以蕪音用授真賞

手授新書荷至情何時仙訣得真精高年轉覺面顏

少細字全由眼力明藥籙謾勞分上下丹爐終費候

虧盈爭如一語醒然悟獨葆天光不外營

和詩送茶寄孫之翰



雙  
北死靈芽天下精要須寒過入春生故人偏愛雲腴  
白雀句遙傳玉律清衰病萬緣皆絕慮甘香一種未  
忘情封題原是山家寶晝日虛堂試品程

泉州安靜堂

庭松永晝轉春禽天氣初晴又半陰惆悵此生多病  
惱正堪行樂獨傷心

泉州北藏院見初荷華

初華纔過小荷身曉露霑紅點點勻莫爲愁心偏倚  
望清江元有未歸人

詔貢士

星騎翩翩鶴詔來旋聞歡語沸春雷天閑未減真龍  
種滄海還空老蚌胎拂紙半毫合意勁摩雲雙翅待  
風開寄言商頴辟榮客好致吾君放首迴

福州堂下小欄花卉多是手栽今已繁盛因賞  
花有所感悼

愛花盡日傍花臺點檢當年手自栽前事已隨朝暮  
變舊叢空見淺淡開山禽忽下還飛去溪雨纔收又  
復不只有春醪能遣恨無人欄畔共持杯



登四徹亭

偶爾尋幽上翠薇遊人啼鳥似前期花間行印露霑  
紙山下放衙雲滿旗艷艷舞衣朝日處飄飄商鷁落  
潮時傳杯且與乘時醉身世悠然兩自遺

登清風樓

郭外清溪溪外山溪雲飛上破山顏晴明天氣琉璃  
色何處峰頭帶雨還

榴花洞

洞裏花開無定期落紅曾見逐泉飛仙人應向青山

口管却春風不與歸

寄南海李龍圖免求素馨含笑花

二草曾觀嶺外圖開時嘗與暑風俱使君已自怜清  
分分得新條過海無

寄題張景山大卿園池

人仰公才世吏師更甘歸老舊林池門闌清似當官  
處心力強於少壯時物理自冥非寄酒兵謀猶在却  
因棋濠邊風月如招隱願拂塵裾從所之



宋蔡忠惠文集卷之六終

宋蔡忠惠文集卷之六終





